

朔方備乘

朔方備乘卷第二十五

考十九

色楞格河源流考敘

色楞格河

鄂爾坤河

楚庫河

克穆河

阿努河

臣秋濤謹案中國之水由俄羅斯境入北海者

以色列楞格額爾齊斯爲最鉅其他名川細流出
杭愛山北者皆會於色楞格出金山北者皆會
於額爾齊斯二水洶漠北之江河也今考其源
流並所匯各水別自爲卷不編入北徼水道中
者以非俄羅斯境所得攝也仍列於北徼水道
之前者尊中國也色楞格所會諸川莫大於鄂
爾坤河且源流俱在中國故置於前列楚庫河
爲中國與俄羅斯分界之水故次之克穆河發
源中國達羅刹境始與色楞格會故又次之阿

努河亦發源中國達羅刹境始因克穆河以會
色楞格故又次之考會典及一統志諸書於娥
河劍水多詳其源而略其委齊召南水道提綱
不知克穆河卽伊聶謝河至阿努河下游紀載
家或誤以爲入額爾齊斯蓋言漠北水道若此
其難也今薈萃中西圖籍述爲是考或可爲講
邊防者之一助歟

色楞格河

色楞格河

臣秋濤謹案色楞格河一曰仙娥河見唐書同鵲傳

一曰仙萼河唐書地理志有仙萼州即以水爲名也一曰昔令

哥河見朔漠圖一曰僕輦傑河見元歐陽元高一目僕氏家傳一

曰錫蘭河見元耶律鑄雙溪醉隱集一曰薛靈哥水見元史

一曰色冷額河見方略一曰塞倫額河見內一府圖

曰薛涼格河見祕史一曰習靈靄河見瀚海道集

提綱曰漠北水之入北海可知者色楞格最

大源發杭愛頂以南凡鄂勒白稽山枯庫嶺

忒呵都伊嶺烏可克嶺以東杭愛尾及都蘭

喀喇山杭亦哈馬喇山與杜蘭喀喇山阿不
達拉太山以北大興安山大小肯特山以西
數千里川澤俱匯而北瀦爲白哈兒湖爲漠
北第一巨浸所合如厄赫河鄂爾昆河土喇
河者得河

臣秋濤謹案者得河卽澤德河

楚庫河皆巨川也

臣秋濤謹案提綱所舉各水皆在中國其旣
入俄羅斯界以後所匯各水尤衆如額爾口
河伊爾尼河巴喀拉河冬古薩河諸水亦皆
巨流至伊聶謝爲古劍水其會合處水勢大

於色楞格河然色楞格已瀦爲大湖而伊聶
謝並未有湖泊以淳蓄之則較論所納之水
仍以色楞格爲尤盛也

上源曰齊老圖河出三音諾顏部中左末旗爲
鄂爾哲依圖泊

臣秋濤謹案色楞格河水道提綱載有六源
最北源曰哈喇台爾河出杭愛山頂西南麓
卽會典圖說所云德勒格爾河瀚海集所云
哈拉達爾河也次北源曰布克誰河卽會典

圖說所云布克綏河也南源有四一曰厄得勒河卽會典圖說所云伊第爾河瀚海集所云伊得爾河也次南源曰齊老圖河與會典圖說同名卽瀚海集所云貳吉兔察罕腦爾河也又次南源曰烏里雅台河卽會典圖說所云特爾克河也最南源曰阿濟勒克河卽會典圖說所云阿集拉克河也惟會典圖說以齊老圖河爲正源不取水道提綱六源並發之說蓋水之入東海者以最西之源爲正

源則水之入北海者自應以最南之源爲正
源就南源中論之特爾克河阿集拉克河皆
細流不足當正源之目惟齊老圖河初發源
卽鍾爲巨泊周數十里其爲色楞格之上源
無疑今謹遵之以爲定論云提綱曰齊老圖
河源出西界山下之額爾折衣圖察罕泊泊
在鄂勒白稽山之南幹百餘里大山下西北
經隔山之桑稽晉大來泊百餘里西十六度
八分極四十八度七分泊周六十里自泊東

北流出經烏爾圖吳雅山南麓稍東會西北
來一水又東百餘里有二水自西南合而來
會始曰齊老圖河

東北流經中左旗右翼後旗特爾克河入之

臣秋濤謹案特爾克河卽提綱所云烏里雅

台河也齊老圖河又東北二百餘里受南一
水又東北循山麓流百餘里而烏里雅台河
自西南來會烏里雅台河提綱以爲卽色楞
格又次南一源也出衣孫都蘭喀喇地山北

麓

齊召南曰山在烏勒圖吳雅山東南百數十里亦幹山綿亘不斷

東北流

會西一水南一水折而東而北共三百里會齊老圖河又東北三十里而阿濟勒克河自南來會

又東北流阿集拉克河入之

臣秋濤謹案阿集拉克河卽提綱所云阿濟

勒克河也出衣孫都蘭喀喇地山之東北支峯三水東北流合循山北麓東北共二百數十里北會齊老圖齊老圖又東北二十里會

厄得勒又東北三十里而北源來會

齊召南曰齊老

圖自源至此
長五百里

又東北流伊第爾河入之

臣秋濤謹案伊第爾河卽提綱所云厄得勒

河也

臣秋濤謹案齊老圖河所會水別有額德爾河與此不同或云此水本名伊第

爾作厄得勒者齊召南之筆誤也

源出喀爾喀西界鄂勒白

稽山

齊召南曰卽杭愛山頂之西南大幹山也隔山西卽桑稽晉大來泊也西十六

度九分極四十九度

兩水自山麓東流而合又東會西

南來一水又東會西北來一水又東會南一

水又東稍北會北來一水及西南來二水之
合而東北者又東北一水自西北來入之齊召
南曰共又東名厄得勒河又東北曲曲而東
合七水
齊召南曰共而齊老圖河合諸源水自西南
行四百餘里
來會

德勒格爾河自扎薩克圖汗部東南流來會

臣秋濤謹案德勒格爾河卽提綱所云哈喇

台爾河也會典圖說曰德勒格爾河出唐努
山東南東流踰卡倫又東南流西納伊克和

羅河入喀爾喀扎薩克圖汗部界經右翼右

末旗會托爾和里克河

臣秋濤謹案托爾和里克河出德勒格爾

河源之東亦東南流入扎薩克圖汗部界南流注於德勒格爾河

又經中左

翼末旗西納布克綏河

臣秋濤謹案布克綏河即提綱之布克誰

也河入三音諾顏部界注齊老圖河提綱曰色

楞格河自喀爾喀西北杭愛山頂之西南大

幹諸山發源有六最北者名哈喇台爾河出

杭愛山頂西南麓三水東南流二水東北流

而合經山麓南

齊召南曰源西十七度極四十九度七分去頂西稍南百

里又合西南二水并東北流者稍東而杭愛

南澗自西北來會又東受西北來一水卽杭

愛東澗也折東南流有二水自西南合而來

會

齊召南曰自源至此曲曲已二百餘里

又東南始名哈喇台

爾河曲曲而東百數十里受西北來水一折

而南受西來水一又東南數十里經額爾齊

特山東又東南數十里有一河自西來會卽

次北一源之布克誰河也布克誰河自山中

合五水東流共三百餘里會哈喇台爾河

齊召

南曰布克誰河源在杭愛山頂南稍又東南
東二百餘里即西南幹之曲而東者

二十里而南源來會
齊召南曰北源至此長五百里

轉東流南納額德爾河阿察河北納北特里河
哈拉鄂倫河特里河又東流經左翼中旗中末
旗

臣秋濤謹案額德爾河即南特里河阿察河

即阿又河哈拉鄂倫河即喀喇烏倫河提綱

曰南北源既會始曰色楞格河東流
齊召南曰西十

四度八分極四有南特里河南自溫都勒山
十九度三分

北流來入之

齊召南曰亦曰溫都里山

又東有北特里河

自北合二水南流經哈爾占布勒古得依山

西又南二百里經山麓來入之又東曲曲百

數十里有阿叉河南自呼普蘇古兒山之西

北麓東北流來入之

齊召南曰北岸有山疑卽元時和林上都地山

水迺合西十四度一二分極四十九度三分所云嶺北當指賽堪山及庫庫齊老圖諸嶺

又東有哈喇烏倫河自北山合三水東南流

經納馬納山西麓而南來入之

齊召南曰烏倫疑卽和林

之轉聲元史以西有喀喇和林河得名然又則此河之東色楞格之北卽古和林城也

東南折而東北

齊召南曰兩岸前後有山

有特里河自北

山中合五水東南流三百餘里來入之

又東流哈綏河自西南來會始曰色楞格河

臣秋濤謹案哈綏河卽哈瑞河出三音諾顏

部中左末旗東山東北流經右翼前旗西納

珠薩蘭河南納瑚努伊河又東北流入於色

楞格河考提綱以旣合哈喇台爾河卽名色

楞格而會典圖說則以合哈綏河後始名色

楞格蓋據圖爲言也今從會典圖說提綱曰

色楞格河又東北數十里折東流有哈瑞河
自西南合呼納衣河東北流來會亦巨川也
又曰哈瑞河出西南幹山在齊老圖源之南
隔山三百餘里他米勒河源隔山百餘里西
十六度三分極四十七度七分東北流百里
合西南一水又東會西一水又東會南一水
折而北會西一水又東北有一水自西北大
幹山東流合北來衣孫都蘭喀喇地山南二
水而南流來會又東北百數十里有一河合

二水自南來會始曰哈瑞河又東北曲曲三

百里有米薩朗河自西合二水東流來會又

東北循呼普蘇古兒山之南又東有呼納衣

河自西南山中東北四百里經賽堪山北麓

又東北百餘里來會又東北百餘里入色楞

格河此河源流長九百里

齊召南曰山脉西自枯庫嶺東北分

枝繞此河諸源之南曲曲千餘里爲巴顏濟魯克山又北爲賽堪山卽賽罕山也又東北爲納鄰庫勒墨地北之厄勒黑圖山又東稍南爲厄魯墨德衣山峯嶺不斷山西北爲哈瑞河山東南爲鄂爾渾河

又東流入土謝圖汗部界

臣秋濤謹案色楞格河又東流塔特河自南

來入之又東流歐爾河自西南合四水來入

之又東流扎達河自南來入之又東流巴爾

土河自南來入之皆細流也又東流入土謝

圖汗部界提綱曰色楞格河又東南流折東

北而東有哈喇托惠河

臣秋濤謹案
即塔特河

西南自

厄勒黑圖山來入之又東稍北有阿爾達克

河

臣秋濤謹案
即歐爾河

自西南合三水東北流又合

東二水北流來入之

齊召南曰東來一水名烏兒河

又東受

南來查達河

臣秋濤謹案即扎達河

又東受南來巴里

北河

臣秋濤謹案即巴里土河北字疑杜字之謬

又東流額赫河自西北來會

臣

秋濤謹案額赫河即厄赫河上源爲庫蘇

古爾泊在唐努山烏梁海東南境伊克杭哈

河納林杭哈河哈拉錫爾河納林和羅河俱

出穆遜山南麓南流瀦焉復自泊東南流出

曰額赫河南北合數水庫克陀羅蓋河達爾

沁圖河鄂依拉噶河阿拉輝博勒爾河俱出
卡倫外南流折東南亦來會又東經扎薩克
圖汗部三音諾顏部境又東南入土謝圖汗
部界北納努拉河布科倭河東南會色楞格
河提綱曰色楞格河又東稍北齊召南曰西
十二度四分
極四十
九度餘有厄赫河自西北大山東南流合翁
佳河諸水來會亦巨川也又曰厄赫河出西
北大山下之呼孫古兒泊西十六度至四分
極五十一度三分至七分泊北卽大幹山在

湯努山東北千里泊西隔山卽俄羅斯國之
烏斯河源也泊南北百數十里東西八九十
里周三百餘里中有山曰舍撥兒拖克阿林
近於西北自東南角流出數十里會西來一
水水南有沙拉達藍山又東南流會北來一
水又東南流有敖卽可噶兒漢河自西合二
水東流來會又南流有翁佳河自西合二水
東流來會稍東有敖里可立河合二水自北
大山南合東一水又南合西北來之阿里可

河東北來之烏兀哈河又南百餘里來會又
東南有小水自西南來注之又東南有恩特
河自西南大山東北流合西北一水南三水
來會又東南有巴圖里烏巴什河自北大山
合三水南流來會又東南有拖拉喜河自西
南山合三水東北流來會又東南有額林河
自東北山合二水南流又東合厄不里謀登
苦兒河曲曲南流來會又東南數百里有他
黑巴哈太河自北山合三水南流來會又東

南數百里會色楞格河此水合有名之水有
八源流長千餘里

又東流喀拉瑚集爾河布喀河自南來入之鄂
博爾克倫河自北來入之又東流經右翼左旗
右翼右末次旗特爾格河自北來入之又東流
經中左翼末旗與鄂爾坤河會

臣秋濤謹案提綱曰色楞格河既會厄赫河
水勢愈盛稍東有市呼圖河

臣秋濤謹案卽喀拉瑚集爾河

自南合三水來入之又東北河心有洲有布

喀河自南合一水來入之又東北受北來一

水又東北有一河自西南布昆沙拉山之北

東北流合東南一水北來入之又東受西南

一小水又東經布龍山北麓

齊召南曰山脉西南自巴顏濟

魯克山賽堪山綿亘而東北爲厄魯墨得衣山又東爲西拉克山爲布昆沙拉山又東北爲此山蜿蜒至兩河合處山又東北數百里爲色楞格及鄂爾渾之界

而鄂爾渾河自南合土喇諸河之水東北流

來會

齊召南曰西九度九分極五十度

水勢大盛

齊召南曰色楞格自

源至此已千七百里鄂爾

坤河土喇河二水見後

又東北流經恰克圖西

臣秋濤謹案恰克圖中國與俄羅斯互市處也有理藩院司官駐此其北有俄羅斯國所建市圈設有頭人管轄

又北流達俄羅斯國界

臣秋濤謹案色楞格河西岸有永和爾山東岸有特們瑚珠倭爾輝圖山皆中國與俄羅斯接界處也

又東北流澤德河自西北來入之

臣秋濤謹案澤德河卽者得河也亦作哲德河提綱曰色楞格河旣會鄂爾渾河又東北百里有一水自東南來注之又東北百數十里者得河自西北大山合三水東流九百餘里亦巨川也又曰者得河上源出西北大山三水東流百數十里而合又東數十里有一水自西來曰阿魯謀敦苦兒河東流會焉又東南百餘里會北來一水又東南二百餘里有喀木仰河自北山合三水東南流四百

餘里來會又東南百數十里有遮兒圖勒河

臣秋濤謹案卽澤勒圖勒河

自西大山合二水東南流又

會西南來之卽里多忒河折東北曲曲五百里來會又東百餘里受北一小水又東百數十里入色楞格河

又東北流楚庫河自東南來入之

臣秋濤謹案提綱曰色楞格河又東北百七

十里有一河合三水自西來注之又東北百餘里經鄂羅斯國界之楚庫柏興西南亦曰

楚庫拜商有楚庫河東南自喀爾喀境合數

水西北流來會

齊召南曰西入度八分極五十餘度

色楞格自

合鄂爾渾至此又五百餘里

互詳楚庫河篇內

又東北流西納數小水又北流烏德河自東南來入之

臣秋濤謹案烏德河卽烏得河又作烏的河

蓋卽漢時烏揭國地提綱曰又東北百八十里
有啟兒活河自東南合三水西北曲曲流
四百里來入之又正北流百餘里有敖龍屋

河自西南合三水東北流來入之又北流折
東北百數十里有衣巴勒漢河自西合三水
東北流六百里來入之又正北流百里經烏
得拜商西南有烏得河自東南大山合兩水
四源西北七百里經拜商南而西來入之又
北折而東北百數十里有一河自西南山合
二水來入之

又東北流折而北流伊談珠河自東南來入之

臣秋濤謹案伊談珠河一作伊坦珠河卽衣

灘朮河也提綱曰色楞格河又東北折而正
北百數十里有衣灘朮河自東南大山合兩
水四源曲曲西北流五百餘里經衣灘朮拜
商南而西注之又北經拜商西而北數十里
折而東北而西北曲曲百八十里有一河自
西南合二水東北流三百餘里來入之又曰
自楚庫河而東北如斂兒活河烏得河衣灘
朮河諸源皆出肯特山東北大幹山之北麓
其隔山南麓皆東南流入黑龍江者

又西北瀦爲白喀爾鄂模

臣秋濤謹案白喀爾鄂模一曰白哈兒湖一

曰白哈兒湖均見一統志一曰拜喀爾鄂謨見內府圖

一曰柏海爾湖見異域錄一曰貝加爾湖見地理全志

一曰麥嘉湖見總記一曰拜加爾湖見地理備考一

曰拜刺湖見圖志一曰柏海見一統志一曰白海一

曰菊海說詳下一曰白爾轄湖見坤輿圖說漠北第

一巨浸也提綱曰色楞格河又正北流折而

西北曲曲二百數十里北瀦爲巨澤曰白喀

爾鄂模又曰白哈兒湖亦曰小海南北徑二

百餘里

齊召南曰極出地五十三度九分至五十四度八分

東西徑九

百里或千里

齊召南曰自西七度至十度五分

色楞格自合

鄂爾渾後水清溜急廣四五十丈兩岸多山

於湖之正南流入

齊召南曰西八度五分極五十四度也

湖四

面俱有山

齊召南曰聞有一大水自東北角流入

中有洲曰敖

衣葦山

臣秋濤謹案一作鄂伊衮阿林異域錄作鄂遼漢洲

南北五十

餘里東西二百里十二月冰堅可渡卽漢時

海北丁零

臣秋濤謹案海北當作北海

唐時骨利幹都播

二部落北之少海

臣秋濤謹案少海非此湖辨見下

近黠夏

斯而色楞格卽仙娥河劍河也

臣秋濤謹案劍河在仙娥

河之西旣以色楞格爲仙娥河又以爲劍河非也

湖之大如海一統

志曰白哈兒湖在楚庫柏興北五百餘里亦

曰柏海去喀爾喀北界千餘里乃巨澤也南

北長二百里許東西廣千餘里四面皆山色

楞格河自西南流入

臣秋濤謹案諸書皆作自正南流入與此不同

昂噶喇河自西北流出其從東北流入者又

有一河亦名昂噶喇中有洲曰鄂遼漢在湖

內之東北偏南北五十餘里東西二百里上有山岡多野獸水多魚蒙古五十餘戶游牧於此十二月下旬冰始堅可行三月盡冰始解按唐書地理志骨利幹都播二部落北有小海冰堅時馬行八日可渡海北多大山其民狀貌甚偉風俗類骨利幹晝長而夕短所謂小海卽此水也又按史記匈奴傳匈奴留郭吉遷之北海上漢書蘇武傳匈奴徙武北海無人處使牧羝武旣至海上廩食不至

掘野鼠去草實而食之杖漢節牧羊單于弟
於軒王弋射海上給衣食賜馬畜王死後人
衆徙去丁令盜武牛羊武復窮厄匈奴使李
陵至海上爲武置酒設樂武終不降後漢使
復至匈奴常惠夜見漢使教使者謂單于言
天子射上林中得雁足有係帛書言武等在
某澤中前言北海海上後言某澤以塞外遇
水澤通稱爲海也白哈兒湖地在匈奴正北
與丁零正相近史記匈奴傳冒頓北服丁靈

漢書李陵傳匈奴立衛律爲丁靈王師古注
丁靈胡之別種又蘇武傳注丁令卽上所謂
丁靈耳然則俄羅斯南境卽丁靈故地而白
哈兒湖卽蘇武牧羝之北海上歟臣秋濤謹
案柏海白海與北海音俱相近故地志家疑
卽一地然骨利幹都播北之小海當是烏格
里達海灣非此湖也元史劉好禮被海都拘
執脫走至菊海蓋此湖又名菊海矣

巴爾古錫穆河入其東南

臣秋濤謹案巴爾古錫穆河異域錄作巴爾古西穆河源出伊談珠拜商東北境大山西麓西流約百餘里至巴爾古錫穆城南又西注於鄂模

德爾集昂噶拉河入其東北

臣秋濤謹案德爾集昂噶拉河源出東北大山南麓其北隔山卽集林噶河源也西南流注於鄂模蒙古語德爾集上也此湖受色楞格昂噶拉二水其下游例得互受通稱故俄

羅斯人以入北海之經流槩名昂噶拉河此河因被上游之目矣魏源以昂噶拉河爲謙河謂此河卽謙河上游誤也

復從鄂模西北溢爲昂噶拉河

臣秋濤謹案提綱曰從西北角流出

齊召南曰西十

度二分極五十四度七分曰昂噶喇河

齊召南曰亦曰昂阿拉河圖從五十

度當卽元史所謂吉利吉思之昂可刺河

西北流經伊爾古斯歸城南厄爾庫河自西南來入之

臣秋濤謹案伊爾古斯歸城卽義爾古德斯
科異域錄之額爾庫城也亦曰額爾口城凡
喀爾喀邊境事皆此城頭目掌之提綱曰昂
噶喇河西北流百五十餘里至厄爾庫城受
西南來之厄爾庫河卽圖之厄里口河也源
出阿爾泰頂之東北大幹厄谷登召山之東
北麓臣秋濤謹案卽
額古登昭山有兩水俱東北流西源
合四水東源合三水北流而合又東北有一
河自東南合二水東北流折而西北曲曲來

會又北曲曲流兩山間自極五十二度北至五十五度徑已八百餘里

又西北流噶們噶河自東北來入之又折而西南流倫多河自北來入之又西南流逕博拉斯歸城北集達雅河自東南來入之又西南流薩瑪爾河自東北來入之又西南流納南來一水

臣秋濤謹案有一水出穆遜山北二源並發北流注昂噶喇河此水發源處在通肯圖拉西北其東卽額爾口河源也

轉西北流伊爾尼河自東北來入之

臣秋濤謹案昂噶喇河折西北流至里庫諾

伊卡倫南

臣秋濤謹案此俄羅斯所設卡倫

納伊爾尼河伊

爾尼河卽異域錄之伊里穆河也源出伊林

斯歸城北山

臣秋濤謹案伊林斯歸卽異域錄之伊里穆城縈繞城

之北東南三面折而西南流至里庫諾伊卡

倫東來會約長六百餘里昂噶拉河自合伊

里穆河之後俄羅斯人亦呼爲通古斯科河

又西流古爾班孟訥斯河自南來入之

臣秋濤謹案古爾班孟訥斯河源出穆遜山

西北麓其南隔山卽中國之騰吉斯河源也

三源並發故以古爾班爲名

臣秋濤謹案蒙古語古爾班三

也西北流九百餘里入於昂噶喇河

又西流滿達河自南來入之又西流罕河自東

南來入之

臣秋濤謹案罕河源出托羅斯嶺北麓其南

隔山卽中國之伯集克穆河源也西北流二

百里折北流二百餘里合東南來一水又西

北流合南來一水曰噶捫噶河又西北逕噶
捫噶噶珊南繞其西北入昂噶喇河

又北流伊聶謝河自中國發源合阿努河諸水
曲折東北流來會曰惹尼色河

臣秋濤謹案伊聶謝河卽中國之大克穆河

也互詳克穆河篇內阿努河亦發源中國互詳阿努河篇內

齊召南曰聞伊聶謝河長三千餘里受十餘

水較色楞格又大五六月尙有冰當卽元史

所云謙河也

臣秋濤謹案惹尼色卽伊聶謝譯文之異自此以後直至北海

通稱惹尼色河一作惹尼色斯河一作日尼塞河一作也尼塞河一作因尼西河一作葉尼賽河

又北流逕伊聶謝柏興東

臣秋濤謹案伊聶謝柏興卽惹尼色斯歸城亦曰也尼塞斯科康熙間使臣圖理琛由厄爾庫城乘舟至此順流晝夜行水程三千餘里沿途河岸寬闊之處間有田畝其山陂少平之處亦有耕種者有小柏興甚稀俄羅斯與布喇特及索倫人等雜處又曰昂噶拉河

兩岸奇巒絕壁疊秀橫空斷岸千尺水聲淙
淙巉石嵯峨橫波峭立風高浪激奔注如矢
又曰昂噶拉河內有伯克五處臣秋溥謹案
伯克一作碑
克破落克八處西費喇九處河內高峰及臨
水懸崖俄羅斯人名之曰伯克河兩邊皆峭
壁中有大石水直陡下流者俄羅斯人名之
曰破落克水淺有石水緊溜急之處俄羅斯
人名之曰西費喇五伯克之名曰臧提別西
伯克巴達爾滿斯克伯克多達兒斯克伯克

滅費斯克伯克費達穆克伯克入破落克之
名曰博合滅爾納破落克皮牙乃破落克巴
敦破落克多爾規破落克沙滿斯克破落克
阿普林斯克破落克木爾蘇斯克破落克四
鐵烈洛什破落克九西費喇之名曰鄂標穆
索斯柰西費喇洛什西費喇柏格西費喇郭
洛活瓦西費喇郭費殷斯克西費喇噶什那
西費喇鄂費夏那西費喇鄂爾吉那西費喇
郭薩牙西費喇又曰伊聶謝柏與四面皆山

岡伊聶謝河自南流來大於昂噶拉河其昂噶拉河來自東南離柏興十餘里歸入伊聶謝河又繞過柏興向東北流入北海

又北流科穆河自西來入之

臣秋濤謹案惹尼色河又北流必特河自東來入之又北流西納科穆河科穆河出瑪古斯歸城東北山東北流約二百里逕伊聶謝柏興之北又東入於昂噶拉河

又西北流左右各納數小水又北流鄂羅河自

東來入之

臣秋濤謹案惹尼色河又西北流傅爾底雅多瓦河自西南來入之又西北流阿巴里尼雅河自東南來入之又北流伊薩郭瓦河自東來入之又北流納東來一小水又西北流噶里克河自西來入之又西北流德薩底納河自西南來入之又西北流必多巴河自東來入之又北流色勒斯尼河自西南來入之諸水皆細流也又折而東北流與鄂羅河合

鄂羅河源出里庫諾伊卡倫北山曲曲西北
流四百餘里又西入於惹尼色河

又西北流左右各納數小水

臣秋濤謹案惹尼色河又西北流多羅西河
自東來入之又西北流音多沙雅河自西南
來入之又北流有一水自東來入之達羅瓦
雅河自西來入之又西流折北流有一水自
東來入之欣河自西南來入之

又北流巴喀拉河入之

臣秋濤謹案巴喀拉河源出日爾郭瓦泊在

伊林斯歸城西北泊周數百里日爾郭瓦博

爾薩雅河入其東南日爾郭瓦謨拉達河入

其西南復從泊西北角流出西北流百餘里

與東南來之特德拉河會

臣秋濤謹案此河出伊林斯歸城東

北大山北麓行三百餘里西流來會

又西北流散巴納倭拉河

自東北來入之又西流納南來一水又西流

遜噶蘇爾薩雅河自東北來入之此河源出

一泊周數十里又西流納南來一水又西流

曰博特噶捫納河又西流丰取斯噶河自北
來入之又西流納南來一水折北流索瑪雅
河自東北來入之又西北流二百餘里曰巴
尼巴河有倭羅鄂巴河自東南來入之此河
源出一泊周數十里又西流勒特納雅河自
東南來入之

臣秋濤謹案此河源出
索瓦湖湖周百餘里又西流

始名巴喀拉河又西流入於惹尼色河此水

源流長千數百里亦巨川也

又西北流左右各納數小水

臣秋濤謹案惹尼色河又西北流錫特噶瓦河自東來入之又西北流納西來一水又北流巴納音河自東來入之又西北流納南來一水又北流郭羅古河自東來入之又北流惹老烏河自西來入之德底噶河自東來入之又北流米拉河自東來入之又西北流博集里噶河自西南來入之

又西北流惹羅珊河入之

臣秋濤謹案惹尼色河又西北流約二百里

徑德羅伊特斯郭格廟之西惹羅珊河發源
西南窩集中曲曲東北流入百餘里經多羅
三色吉城南又東入於惹尼色河
又北流冬古薩河入之

臣秋濤謹案冬古薩河蓋卽唐書所載同羅
水也源出希穆斯歸城南希穆斯歸南距伊
林斯歸一千一百餘里北距冰海一千六百
餘里冬古薩河西流曲曲百餘里巴爾倭登
噶河自南來入之又西南流訥巴河自東南

來入之

臣秋濤謹案異域錄有伊里穆河卽所稱伊爾尼河非此河也

又西

河自東北來入之又西流伊里穆河自東南

羅瑪河自南來入之又西北流羅斯瑪納噶

爾薩惹野里瑪河自東南來入之又西流惹

來入之又西流曰郭勒斯郭野河又西流博

流伊爾達河自南來入之都里噶河自東北

來入之又西流惹勒拉雅河自東北來入之

又西流索額達拉雅河自南來入之又西流

達穆拉河自南來入之又西北流勒達訥達

河自南來入之又西北流納東來一水又西北至德羅伊特斯郭格廟北又西入惹尼色河

又西北流逕多羅三色吉城東

臣秋濤謹案多羅三色吉城卽唐多濫葛部地也

又西北流左右各納數小水

臣秋濤謹案惹尼色河自多羅三色吉城東折西北流繞城北又西流有一水自南來入

之又西流多訥斯奇納河源出窩集中自東北來入之又西納北來一水折西北流伊哈河自西南來入之噶多噶河自東北來入之又西北流烏伯河自東北來入之伊薩拉克河自西南來入之又西北圖替納河自東來入之又折西流納南來一水又西北流頗替納河自東來入之又折東北流烏伯尼雅河自東來入之又西流舍達河自西南來入之又西北流謨斯圖伊噶河自東來入之

又北流入於北海

臣秋濤謹案色楞格河入海處名烏格里達
海灣商舶多聚焉圖理琛言伊聶謝柏興距
北海大洋一月程蓋三千里也統計色楞格
河自發源至入北海凡九千一百餘里自烏
格里達浮海而北數百里有大島名伊策三
布拉島南北袤六百餘里東西廣一千三百
餘里唐書謂骨利幹北有小海冰堅八日可
渡者卽指烏格里達以北之海也其云海北

多大山其民狀貌甚偉晝長夕短煮羊腓纔熟天卽曙者卽指伊策三布拉島也

鄂爾坤河

鄂爾坤河出三音諾顏旗二水合東流北合一水經右翼中右旗右翼左末旗中前旗額魯特旗折北流入土謝圖汗部界經土謝圖汗旗

臣秋濤謹案鄂爾坤河一作鄂爾昆河一作

鄂勒昆河水道提綱曰鄂勒昆河亦曰鄂爾渾河舊名阿魯渾河音之轉也源有二一出

杭愛山尾南麓齊召南曰西十四度五分極四十七度東南流

曰姑洛河齊召南曰杭愛山自西北枯庫嶺蜿蜒而東南四百里又東行百餘

里連峯相接山勢高大折東北數十里曲曲其麓爲姑洛河源又東行蟠際數百里

二百里而南源自西來會南源出鄂爾吉圖

都蘭喀喇山又有二齊召南曰亦作威者伊圖都蘭喀喇山卽大黑

山也在杭愛之一自北麓東南流曰阿木勒

南八十餘里齊召南曰西十四度六分極四

稽烏林塔河十六度八分亦作烏里雅思他

河此地元時屬和林疑烏林烏里皆和林音之轉也一自東麓東流百

里而合又東百餘里與姑洛河會始曰鄂勒

昆河東南流兩山間百里折而東北

齊召南曰北岸

山即杭愛山東南支阜其南岸即西自都蘭喀喇綿亘而東為杭亦哈馬勒山隔山而南

即獲金二百餘里經西爾哈阿濟爾罕山西河也

麓之額勒德尼詔廟

臣秋濤謹案額勒德尼詔廟即額爾德尼昭雍

正十年喀爾喀親王額駙策凌大破準噶爾之衆於此

及章鄂山之東

麓

齊召南曰章麓山亦高大即杭愛東支阜也疑此即唐時回鶻牙帳西之烏德隄山

而所謂盟昆水即鄂勒昆也

轉西北流濟爾瑪台河入之

臣秋濤謹案鄂爾坤河又東北出山流百七

十里折而西北流二百里有濟爾瑪台河自西南來會濟爾瑪台河一作朱爾馬台河出三音諾顏部右翼中右旗東流經額魯特旗入土謝圖汗部界注於鄂爾坤河水道提綱曰朱爾馬台河亦曰朱勒馬台河出額黑鐵木兒山南麓東南流繞布庫鐵木兒山足折而東北流曲曲二百餘里諸爲池曰察罕鄂模廣數十里又東北流百里有布勒哈爾台河南自達爾湖喀喇巴冷孫地之池水東北

流來會又東北入鄂勒昆河

又西北流塔米爾河入之

臣秋濤謹案鄂爾坤河又西北流五十里有鄂歸池水自東南來會又西北有塔米爾河自西南合數水東北流來會亦巨川也會典圖說曰塔米爾河出中左末旗東南山東流南北合數水經右翼中右旗察罕鄂倫河出其西山東北流來會又東經額魯特前旗入土謝圖汗部界入於鄂爾坤河水道提綱曰

他米勒河亦曰塔米爾河有南北兩源南源
出杭愛山北麓在鄂勒昆源之西者曰呵索
郭特河西北流百里許又在其西五十里者
兩澗北流而合又在其西南九十里者三澗
合而東北流有西北來二水皆會又東北始
曰他米勒河又北而會呵索郭特河皆杭愛
以北水也又東北會東南來一水其東卽蘇
巴勒干山又北經特禮布拉克地東受西北
來一小水又東北受西北來之朝穆多河又

東北經布拉干地南受西北來一小水稍東有車車勒里克河自南來會又東北受西北一小水又東北折而北流有一河合四水自西來入之又東北與北源會北源出枯庫東麓在杭愛山西北三百里有二澗東北流而合又北會東南來一水又東北而三澗自西北合而東流稍北來會又東北會西北來一水又東會南來一水又東北會西北一水始曰他米勒河北岸連山卽哈瑞河諸源也又

東流受北一水又東有一河西南自哈龍恩
格勒山東北流合二水來會又東瀦爲台魯
勒倭黑池廣數十里中有一山又東流有察
罕烏林河自西北來會其南岸卽布拉干北
山也疑卽和甯又東北百數十里而南源自
西南來會又東曲曲百里折而東北百里會
鄂勒昆河此水兩源俱五百餘里始合又二
百里入鄂勒昆自杭愛山以北枯庫嶺以東
諸泉皆匯入焉

又合數小水折東流經左翼前旗右翼左後旗
與土拉河會

臣秋濤謹案提綱曰鄂勒昆河又西北折東

北流有依蘭喀勒奇拉河合三水自西來入

之又東北折正北循庫庫齊老台山西麓百

里經西里布里都地之蘇都池東齊召南曰池周十數

里又西南有小池又西百里卽巴顏濟魯克山連峰不斷又北受西一小

水折而東北循西北麓有濟蘭崇古魯克河

自西北賽堪山東南流來入之齊召南曰賽堪山甚高大

即巴顏濟魯克山之北行正幹又
折而東北爲厄勒黑圖諸山者 又東經納

鄰庫勒墨地南受北一小水又東北至山麓

有厄魯墨河北自厄魯墨得衣山池水南流

來入之

齊召南曰池水以北隔山水俱北入色楞格河者

又東經都

闕哈喇地北出山

齊召南曰即庫庫齊老台山之麓此山自南而北折

而東長二百數十里當鄂勒昆東南岸其東有溫泉

有哈兒渾木克河

自東南來會又東流稍北曲曲四百里

有哈噶思三因杜魯河西北自布昆沙勒山東南

流合一水來會

齊召南曰山即西承阿魯墨得衣及西拉口山東北大幹

又東北爲布龍山以又東而土喇河自南合
界色楞格南岸者

喀魯忒哈河北流來會會典圖說曰土拉河
出土謝圖汗部右翼左末旗南流西納哈拉
圖魯河紅郭爾河經中旗折西流經庫倫又
經中右末旗中右旗喀嚕哈河出左翼中左
末旗北流經中左旗來會又北流經右翼左
旗入鄂爾坤河提綱曰土喇河卽圖拉河發
源喀爾喀中部敖嫩河源之西南百數十里
許忒勒兒几嶺之西曰圖拉色禽

齊召南曰
西七度八

分其東隔山即流入克魯倫之忒西南流六
勒兒几河源也極四十八度五分
十里與北源之出嶺北小肯忒山南流百餘

里曰喀拉禿魯河會齊召南曰北源隔山東
北八十里即敖嫩色禽

也西八度極四西南流九十里
有哈奚河自十八度八分

西北合東來喀拉鄂模水西北來空烏魯河

東南流來會又南五十里有噶拉泰河自東

南大山西流來會齊召南曰山即噶拉泰嶺
北自肯忒山忒勒兒几嶺

綿亘而南又南折而西為啟拉薩山其東水
皆流入克魯倫其西水皆流入土喇此山又
西南為興安嶺為阿不達拉太山南臨大漠
又西為杜蘭喀喇山綿亘土喇河之南岸又

西北至會喀魯忒哈河又西南經啟拉薩山處而止首尾千有餘里

西麓又西南有阿拉克他河自北來入之又

西南有特勒兒即河自西北大山合東占河

二水東南流又合東北虧羅河來入之齊召南曰

山即肯忒山之西南大幹綿亘不斷又西南為阿達海嶺為色兒必嶺又南經

興安嶺西支阜曲曲折而西流經厄圖克山

南麓其南岸即昭莫多地齊召南曰在興安嶺西百里河岸平

地其西曰巴顏朱拉克山聖祖北征擊殲噶爾丹

勒銘處也折西北曲曲流又折而西經汗山

東北麓有坤河自南來會

齊召南曰汗山在昭莫多西三十里

亦曰慙山爲喀爾喀中部駐牧地山之東麓有坤河自南來北入土喇河又西有

烏里牙思太河自北大山來入之又西有色

兒必河自北來入之

齊召南曰卽色兒必嶺東北麓水也又西

至色兒必嶺南麓曲曲西南二百數十里至

杜蘭喀拉山之北

齊召南曰杜蘭南卽大漠西十度極四十七度五分

杜蘭喀喇南經甯夏九度經套北陰山六度

隨山折而西北流

齊召

南曰南岸卽杜蘭支阜綿亘北岸卽色兒必嶺支阜又北行爲查木勒山

曲曲四

百餘里有喀魯忒哈河自西南合數水東北

流來會亦巨川也

齊召南曰喀魯忒喀河源出平地在甕金河之北二

百里鄂爾昆河北折之東四百里西十二度

極四十六度七分有二泉西北流而合又西

北百餘里有一水西南自科洛爾昆山東北

流百里有會山在額勒德尼昭之東南九十

里又北流經昆庫勒山西折東北經科克內

山西又北流折而東北曲曲數百里與土喇

河會水口東即查木勒山西麓也此水源流

長七百里西十一度四分極四十八度四分

土喇河又東北折而正北流三百里而鄂勒

昆河自西來會

齊召南曰西十一度四分極四十九度此水源流長一千

六百

又東北經右翼左旗北合二水南與哈拉河會

臣秋濤謹案提綱曰鄂勒昆河又東北經卽
拉哈卽圖布拉克地南有西拉說博太河北
自布龍山南支阜合三水南流來入之又東
北經喀里呀拉山西南麓中有大洲又北流
有衣本河自西北布龍山東南阜合三水東
南流來會又東北循山有哈拉河自東南合
數水北流來會亦巨川也會典圖說曰哈拉
河上源曰通克拉河亦出右翼左末旗南流
經庫倫南納魁河折西流經右翼右末旗北

納哈達瑪爾山水南納多拉錫山水博羅河
折北流注鄂爾坤河提綱曰哈拉河源出土
喇河北與汗山相對之色爾必嶺之北麓曰
揆河二澗合而北有那林河自西南來會又
北有布勒哈泰河自西來會又北有阿達海
河自東南松納拉河自東來會又北有通勒
河東北自阿卽肯忒山之西麓合三源西南
流來會又北折西北流有一河自東北合數
水來會又西經拖羅什山北哈達圖兒山南

有博羅河自南會又西北有查克杜兒河自西南會又西北折正北流經杜拉孫那拉酥查克丹地之東大松嶺也又北經喀里呀拉山東麓又北入鄂勒昆河此水源流六百里又北流伊遜河入之又北流齊雅圖河入之又北與色楞格河會

臣秋濤謹案提綱曰鄂勒昆河又東北有衣

魯河自東南合三水來入之又西北流至布龍山東北支阜而色楞格河自西來會自源

至此曲折二千餘里按衣魯河當卽伊遜河
別名其齊雅圖河則提綱遺之當據會典圖
說補正也

楚庫河

楚庫河爲中國與俄羅斯分界之水源出陽阿
林

臣秋濤謹案水道提綱曰楚庫河爲俄羅斯
及喀爾喀界源出喀爾喀阿卽格肯特山之
北麓隔山之南卽土喇河源隔山東南卽敖

嫩色禽也凡三源東北流百餘里而合

自俄羅斯境西流經中國土謝圖汗部卡倫外
右翼左末旗東北山諸水皆北流出卡倫匯焉
臣秋濤謹案水道提綱云又東北行平地中曲
曲三百餘里有一河合三水自東南大山來會
折西北流百餘里有一河合二水自東南大山
來會按提綱所記水皆無名又言楚庫河水東
北流亦與地圖不
合今據圖訂正

臣秋濤謹案楚庫河自俄羅斯境西流至明
几卡倫外庫謨里河自卡倫東三源並發東
北流來會楚庫河又西過庫布倫台山南俄

羅斯境山也又西南流納雅魯哈當蘇河是
河自明几卡倫西南三源並發出卡倫外北
流入焉楚庫河又西流有一水自烏雅勒喀
卡倫內發源出卡倫東來會楚庫河又西逕
卡倫北有阿魯齊都勒河自肯特山北發源
合二水北流來會楚庫河又西流有一水發
源肯特山北流至庫德里卡倫東來會楚庫
河又西過庫德里卡倫北有哈扎河出博羅
努特山北東北流至卡倫西入於楚庫河

轉北流入俄羅斯界

臣秋濤謹案楚庫河折北流逕俄羅斯伊拜商西又北流逕鄂伯爾齊都勒拜商西

又西北流有齊蘭河自南來入之

臣秋濤謹案齊蘭河出齊蘭卡倫外北流入於楚庫河

又西北流逕楚庫拜商南又西流與色楞格河會

臣秋濤謹案水道提綱云又西北曲曲流三

百數十里經楚庫城南而西入色楞格河

克穆河

克穆河出托羅斯嶺

臣秋濤謹案克穆河一作克木河一作客木河在唐努烏梁海旗境乃俄羅斯國伊聶謝河之上源也元史謙河亦卽此水或以昂噶喇河爲謙河失事實矣托羅斯嶺在穆遜山西北嶺之陰爲俄羅斯界嶺之陽爲中國界曰華克穆河南流陶托泊水入之

臣秋濤謹案華克穆河出托羅斯嶺南麓南
流經哲布尊丹巴呼圖克圖門徒所屬烏梁
海三佐領之西又南流陶托泊水自東來匯
陶托泊水源出穆遜山西麓兩源並發合流
曰烏魯河西流瀦爲陶托泊和金哈河匯其
北有二水匯其南復從泊西北流出入於華
克穆河此地卽元時撼合納部舊壤也按元
史載撼合納部在烏斯之東謙河之源出此
其境上惟有二山口可出入撼合納猶言布

囊蓋口小腹巨地形類此因以爲名山水林
樾險阻爲甚野獸多而畜產少貧民無恒產
者皆以樺皮作廬帳以白鹿負其行裝取鹿
乳採松實及劓山丹芍藥等根爲食卽此河
源所經也亦作慙合納部

轉西流布斯河入之又西多集瑪河入之

臣秋濤謹案華克穆河折西流經扎薩克圖
汗部所屬烏梁海一佐領之西北又西流布
斯河出章哈山北麓自南來匯又西多集瑪

河自北來匯

又西特里泊水入之

臣秋濤謹案特里泊水出唐努山北麓西北

緒爲泊又西北流自南來入於華克穆河

又西哈爾吉河入之又西扎噶泊水入之

臣秋濤謹案華克穆河又西流哈爾吉河自

南來匯又西流有扎噶泊周數十里當唐努

山北近吉里克卡倫隔山之東緒爲泊其水

東北流哈拉穆楞河自東南來匯又東北流

自南入於華克穆河

又轉北流

臣

秋濤謹案華克穆河折而北流經扎薩克

圖汗部所屬烏梁海一佐領境納東來一小

水其西岸當卽元謙州舊壤也考元史言謙

州亦以河爲名去大都九千里在吉利吉思

東南謙河西唐麓嶺之北居民數千家悉蒙

古回紇人地沃衍宜稼唐麓嶺卽今唐努山

謙河至此折而北流故謙州得在其西矣

貝克穆河自東北合諸水來會

臣秋濤謹案華克穆河北流約四百里許而會貝克穆河自發源至此已一千一百餘里矣貝克穆河源亦出托羅斯嶺南麓在華克穆河源之西水南流瀦爲伯魯克泊復南流博爾魯克河自南來匯折西流阿薩斯河亦出托羅斯嶺瀦爲圖集泊從泊中流出自北來會又西流庫克穆河自南來匯又西流哈彥薩拉克穆河出托羅斯嶺西麓瀦爲特爾

里克泊復從泊中流出與北來之伯集克穆河合自北來入於貝克穆河貝克穆河又西流納南來一水及北來之鄂克穆河又西流納南來一水及北來之伊博克河又西與華克穆河會貝克穆河自發源至此凡五百餘里匯有名之水七亦巨川也元史云東北有水曰玉須會於謙而注於昂可刺河玉須水當卽貝克穆河矣

二水旣合曰大克穆河又西流圖蘭河入之

臣秋濤謹案圖蘭河出塔爾噶克山西南麓南流合西北來之鄂克河又南流自北入於大克穆河元之益蘭州當在圖蘭河旁考元史言謙州益蘭州距大都皆九千里二州之境相距不甚遠也

又西流左右各納數小水

臣秋濤謹案大克穆河又西流謨什克河巴拉克河皆自南來入之又西流烏蘭烏蘇河自北來入之又西流謨和爾阿拉河自南合

一水來匯又西流額錫穆河自北來匯又西
流察漢河拉爾河自南合一水來匯又西流
特穆爾烏蘇河自北來匯又西流扎庫爾河
自南合三水來匯

又折北流克穆齊克河自西來會

臣秋濤謹案克穆齊克河出唐努山北麓其

南隔山卽烏布薩泊也克穆齊克河東北流
巴爾魯克河自南合一水來匯又東北阿克
河自西來匯又折東流北納一小水南納集

爾噶瑚河又東流北納一小水南納扎達克
河又東流入大克穆河提綱以此水爲克穆
河西南源長五百里

又北流達俄羅斯國界噶哈爾河自西來入之
又北流烏斯河自東來入之

臣秋濤謹案大克穆河又北流其西岸曰克
穆克穆齊克博穆山乃中國與俄羅斯交界
處也又北流噶哈爾河自西來入之噶哈爾
河出中國境鄂爾噶汗山之北麓北流達俄

羅斯界折東流入大克穆河大克穆河又北流有烏斯河自東來匯烏斯河出塔爾噶克

山北麓

水道提綱記烏斯河發源處云卽呼孫古兒湖之西隔山在杭愛山頂北

六百餘里自東南合三水西北流七百餘里來會

卽元烏斯部舊壤也按元史烏斯亦因水爲名在吉利吉思東謙河之北其俗每歲六月上旬刑白馬牛羊灑馬湏成就烏斯水以祭河神謂其始祖所從出也

又西北流逕烏邁圖喇東

臣秋濤謹案烏邁圖喇蓋卽元吉利吉思部舊壤也考元史云吉利吉思南去大都萬有餘里相傳乃滿部始居此及元析其民爲九千戶其境長一千四百里廣半之謙河經其中西北流又西南有水曰阿浦東北有水曰玉須皆巨浸也會於謙而注於昂可刺河北入於海俗與諸國異其語言則與畏吾同廬帳而居隨水草畜牧頗知田作遇雪則跨木馬逐獵土產名馬白黑海東青覈其所居蓋

古黠戛斯境知克穆河卽劒河矣

又北流阿努河自中國發源合阿穆哈河諸水
自西南來會

臣秋濤謹案大克穆河又北流六百餘里合
阿努河阿努河卽元史之阿浦河也詳阿努
河篇內

又北流逕阿穆哈拜商東又折東北流曰伊聶
謝河又東流與昂噶拉河會

臣秋濤謹案阿努河與阿穆哈河合通稱阿

穆哈河及與大克穆河合俄羅斯人仍呼爲
阿穆哈河故拜商卽以是爲名折東北流六
百餘里曰伊聶謝河又東流逕伊聶謝柏興
南與東南來之昂噶拉河會又北入於海詳
見色楞格河篇內

阿努河

阿努河出唐努烏梁海旗北鄂爾噶汗山

臣秋濤謹案鄂爾噶汗山在唐努烏梁海旗

西北阿努河及察罕米哈河阿穆哈河皆出

其北麓

北流察罕米哈河入之

臣秋濤謹案察罕米哈河發源鄂爾噶汗山

北麓

臣秋濤謹案在阿努河源之東

北流逕敖蘭烏納瑚山

西

臣秋濤謹案山之東卽三音諾顏部所屬烏梁海十三佐領也

又北流折

西北流入阿努河

又北流阿穆哈河入之

臣

秋濤謹案阿穆哈河發源鄂爾噶汗山西

北麓

臣秋濤謹案在阿努河源之西

北流逕烏梁海十佐領

之東

臣秋濤謹案其西卽哈屯河科布多所屬阿爾泰諾爾烏梁海境也折而

東北流入阿努河

又北流達俄羅斯界過烏邁圖喇西境

臣

秋濤謹案阿努河東距烏邁圖喇約二百

里

轉東北流南北各納一小水又東北流衛巴特

河入之

臣

秋濤謹案衛巴特河出托穆斯科東境山

其發源處距托穆斯科約四百里東流入阿

努河

又東北流逕阿穆哈拜商南

臣秋濤謹案阿努河與阿穆哈河合故互受通稱也

又東流入於克穆河

臣秋濤謹案阿努河卽元史之阿浦河也近人有謂阿努河入額爾齊斯河而轉疑元史所記阿浦會謙河爲誤者蓋未詳考諸水之源委爾克穆河下游會色楞格河入北海詳

見前

朔方備乘

卷二十五

色楞格河源流考

率

朔方備乘卷二十五

知縣林穗初校
知縣丁紹基覆校